

BRINZAULS

Relativamaintg chiet,
nignas grondas ramplunadas

RTR è sto agl ier, glindesde ed ò pudia vurdar sen la costa digl Piz Linard tgi schea survart la vischnanca da Brinzauls. La vischnanca è siva da venderde passo evacuada percheigl experts chintan igls proxims deis cun ena crudada da crappa.

Anc vala la fasa «cotschna»

Anfignen ossa na vegli betg do grondas ramplunadas, rapporta RTR. Tenor las prognosas digl cumegn d'Albula/Alvra vigna ena gronda crudada dantant adegna pi probabla. Ainten las vischnancas vischinantas sper'ins tgi na detta betg donns materials, e tgi la crudada da crappa geia sper la vischnanca or. Schiglio seia tot calm, er a Casti. Angal l'egn u l'oter auto sen veia sa ferma, probabel per far ena fotografia dalla costa tg'è ainten las medias an l'antiera Svizra e sur igls cunfegns or.

Siva da venderde las 18.00 vala en scumond d'antran ar la zona da prieve. Ed ins ò da chintar cun ena crudada da crappa, chegl inditgeschan las misiraziuns digl muviment digl colm. Pigl mument vala percheigl la fasa «cotschna» (fegn da redacziun: glindesde 17.00). Avant tgi duess mintga mument dar ena ruschnada u ena gronda crudada da crappa, vign decreta-da la fasa «blava». (rtr/fmr)

SAVOGNIN

Ena gratulaziun siva l'otra

Numerous telefons e messadis cun gratulaziuns ò Damian Cadotsch da Savognin retschet siva digl 1. da matg. La raschung: el ò gudagnea 30 000 francs.

GION NUTEGN STGIER/FMR

Cletg extraordinari per *Damian Cadotsch* da Savognin igl 1. da matg 2023. Alla fegn dall'emissiu da quiz «1 gegen 100» da SRF è cumparia en trav cugl sies nom e la sia schlatta ainten la televisiun. La raschung persiva è tgi igl inschignier forestal ò gudagnea 30 000 francs cun en singul telefon. Tar mintga emissiu on igls aspectatours la pussebladad da gudagner ena somma da 5000 francs anfignen 30 000 francs, tot tenor annunzta d'*Angélique Beldner*, siva digl schaner 2020 la moderatoura dall'emissiu. Anfignen curt avant la fegn digl quiz ò mintga aspectatour la pussebladad da telefonar u visar igl sies nom e la schlatta per internet per gudagner la somma annunzta.

Fatg viva pigl
grond cletg

La nomra 0901 544 311 ò damai purto cletg a Damian Cadotsch cun esser el ensatge siva las 21.00 la persunga furtinada tgi ò gudagnea igls 30 000 francs. El dei igl suandont: «la va mi-anc vasia tg'igl mies nom è nia annunzta cun gist esser aint igl boggn». Sia partenaria *Tanja Koch*, vegia er betg gist reagea dalunga e gia da spular anavos l'emissiu per propi esser persvadeida digl cletg dad el, dei Damian Cadotsch. Curt siva la fegn dall'emissiu vegia el gia en telefon siva l'oter e retschet numerosas gratulaziuns per «WhatsApp».

Ensatge ò Damian Cadotsch er anc detg: «Sa tgapescha tgi vagn anc fatg viva e bavia ena clocca vegn chella seira er sch'era previa dad eir pi bod a letg». A Savognin ed er dapertot noua tg'el antopa persungas ancunaschaintas retscheva el gratulaziuns an en cuntign. Marde vegia la redacziun dall'emissiu «1 gegen 100» alloura s'annunzta per confirmar igl sies gudogn, ò menziuno Damian Cadotsch. Bel seia tgi bleras persungas vegian gia plascheir digl sies grond cletg. Vurdo l'emissiu on, tenor SRF, 419 000 aspectatours ed aspectatours. Quantas persungas tgi vegian telefono seia betg public, dei la redacziun dall'emissiu sen dumonda dalla FMR. SRF emetta «1 gegen 100» siva dall'antschatta da settember 2008.

PS ALVRA SURSES

Adrian Ballat è nov suprastant

A caschung da sia radunanza annuala ò la PS Alvra Surses eligia *Adrian Ballat* da Surses scu successour dad *Andrin Caviezel*. Chel veva tenor comunicaziun allas medias demissiuo siva dus onns an suprastanza, chegl causa da sia midada a Coira. Pinavant èn igl ulteriors suprastants nias reeligias: *Seraina Schutz* (Filisour), *Giglia Gantenbein* (Casti) e *Rolf Marti* (Cunter). Sper las elecziuns internas èn er chellas digl cunsegl nazional tgi on li chest aton stadas tema dalla radunanza. (cdm/fmr)



Messa celebrada digl uestg Joseph Maria Bonnemain per la populaziun da Brinzauls an preschient-scha da blers parochians digl antier Surmeir.

FOTOS GION NUTEGN STGIER



Ruia è er nia tar Nossadonna.



Dalla parteida alla messa: (da san.) Thomas Kollegger, mastral digl cumegn-baselgia Alvra, Martin Candinias, cunsegl nazional, Stefan Engler, cunsegl digl cantuns e Daniel Albertin, mastral cumegn d'Albula/Alvra.



Piglia taimp da discorrer ò igl uestg er cun Christian Gartmann, igl schef da comunicaziun digl cumegn d'Albula/Alvra.

«En angraztg tanscha per dei betg»

Onour per abitants ed abitantas da Brinzauls cun celebrar uestg Joseph Maria Bonnemain a Casti ena messa per rinforzar la speranza da mintgign. La solidaritad è stada gronda betg angal davart digl ot giast, mabagn er da tots parochians da Surmeir.

GION NUTEGN STGIER/FMR

La realitad cun aveir d'evacuar Brinzauls perveia digl prieve dalla bova è betg angal davantada en tema regional, cantunal, nazional, gea schizont en tema internaziunal. La situaziun tgi abitants ed abitantas da Brinzauls on gia da bandunar per so Dia quant dei lour vischnanca è eida fitg profunda er a tot la populaziun da Surmeir. Las autoritads politicsas dalla regiun, digl cantun e dalla Confederaziun èn cun lour patratgs tar vigl e gioven da Brinzauls. Igl destign da chella vischnanca an Val Alvra è er ia fitg a cor a *Joseph Maria Bonnemain*, igl uestg digl uestg da Coira. Tiers en calender da terminis ple tgi plagn ò el piglia gugent taimp per neir a Casti e celebrar ena messa per abitants ed abitantas da Brinzauls. Dumengia seira allas 18.00 era la baselgia da son Stefan a Casti ple tgi angal fulanada, cura tgi igl ot giast ed igl plevant ser *Federico Pelicon*, accompagneas d'ena rotscha ministrants e ministrantas èn antros an baselgia.

Betg nia per pretender da Dia ena miracula

Tranter igl blers parochians dallas vischnancas vashignas, digls oters lis da Sotse e da Surses eran er donnas ed omens da Brinzauls, ellas ed els tg'on er catto la veia a Casti per assister a «lour» messa. All'antschatta dalla messa pareva l'ambianza pitost calma, meditativa, impressiu-nonta, schi betg pitost tresta. Cugls amprens plets digl uestg Joseph Maria Bonnemain è or dalla leva tristezza davanto letezza cun deir igl uestg: «la sung nia cun plascheir a Casti per celebrer la messa, èn mies pansiers tar vous tots da Brinzauls ed er tar tots vous stimos preschaints». El seia betg nia per pretender da Dia ena miracula, mabagn per rinforzar la speranza da mintga abitanta e da mintga abitanta da Brinzauls, ma er da tots preschaints e tot las persungas tgi partan lour dolour cun la populaziun da Brinzauls. I fetscha plascheir tgi er las autoritads politicsas nazionalas, dasper las communalas seian preschaintas alla messa, per exprimer lour solidaritad avers la populaziun da Brinzauls.



Plets profonds digl ot giast da Coira.

Preschaints eran *Martin Candinias*, igl president digl Cunsegl nazional, cunsegl digl cantuns *Stefan Engler* e sa tgapescha *Daniel Albertin*, igl president communal digl cumegn d'Alvra/Albula. «Igl è plaschevel ed er nizevel tgi baselgia e politica s'uneschan tar en cass trouel scu da preschaint chel da Brinzauls», ò detg igl uestg Joseph Maria Bonnemain. El ò angraztgea fitg allas autoritads communalas digl cumegn d'Albula/Alvra, ma er a mintga singula persunga tg'è s'angascheda e tgi s'angascha anc adegna per la populaziun da Brinzauls e pigl destign da chella vischnanca. A mintgign en grond angraztg per la sia responsabladad mussada anfignen oz, ò detg igl uestg da Coira. El ò er detg: «En angraztg tanscha per dei betg, per angraztger dovrigl anc blers oters plets, plets plagn cordialitad».

Sa reunias per exprimer speranza

El seia er nia gugent per celebrar la messa per Brinzauls per mussar ensacu visibel tgi la

tschertezza dalla cardientscha seia nigra frasa. Ainten la veta restan blers dumondas sainza ena rasposta. Mintgign sa dumonda er pertge vign gist ia pertutgia? Pertge piteir, pertge las catastrofes dalla nateira e pertge ghera? Nous s'accurschagn angal levet tgi tiers tot resta Dia a mintgign manevol, ò detg igl uestg Joseph Maria Bonnemain an sies preda impressiuonont. Dia lascha nign aint igl stetg e sulet, ed er la populaziun da Brinzauls betg. Igl uestg ò punctuo: «Dia ans lascha betg anavos scu orfens, sainza retign, sainza vischinanza e sainza soluziun».

Joseph Maria Bonnemain ò menziuno an sies plets tgi tots preschaints seian sa reunias per exprimer lour speranza, per mantgign la speranza da noss cor e per intensivar nossa speranza. Gio ossa seia sa mussada ena ferma cuminanza tranter abitants ed abitantas da Brinzauls. La fraternitad tranter la populaziun da Brinzauls seia an veir senn flureida e la communitad seia s'augmentada ferm, ò detg igl uestg Coira. «Vous tots mies tgers da Brinzauls vez igls davos deis er fatg experienscha tge tgi solidaritad monta, solidaritad dagliunsch e damanevel.» Concludia ò igl uestg igl sies preda cugls plets: «Lagn sperar tgi chella messa ans regala a nous la graztga, da santeir chella anc pi cler, tgi noss bab celestial, tgi Jesus, noss salvader e tgi igl son Spiert laschan nous betg solitars, ma tgi tots seian cun nous e tgi noss Dia fò tras cun nous chegl tgi nous stuagn far tras».

Salido mintgign persunalmaintg

Anramada musicalmaintg è la messa neida cun cant ed orgel da *Roland Capeder*, tg'è nia gugent a Casti per dar agl sarvetsch divin en segn solidaric an furma da cant festiv e da tungs digl orgel dalla baselgia da son Stefan. El ò er accompagna la canzungs cantadas digl parochians, cunzont melodias per venerar Nossadonna, la mamma digl Signer. Siva dalla degna messa ò igl uestg Joseph Maria Bonnemain salido mintgign persunalmaintg e cunzont fatg curasch agls abitants ed abitantas da Brinzauls cun plets pi profonds.